

موندو وراما

إعترافات ضابط

شرطة

تأليف : عبد الفتاح البلتاجي

يونيو 2011

المسرح كأنه سطح عماره أو بيت أو ميدان التحرير أو أي مساحه أخرى .. كل جنبات المسرح تغطيها سوفيتا سوداء الديكور قد يعتمد علي مؤثرات الإضاءة التي سوف تستخدم تبعاً للحالة النفسية التي توحى بالمكان والزمان .. وقد يوجد شاشة في الخلف تعرض عليها بعض لقطات وقد يكتفي المخرج بالحالة النفسية التي تعطي نفس التأثير.

المسرح مظلم الآن بينما نسمع الضابط صائحا ومصاحباً لصوته صوت أقدام عساكر الأمن المركزي التي تدب بقوه مرعبه

ص. الضابط : قوه قف (أصوات الأقدام تتوقف فجأة) قوه أنتشر وتعامل مع المتظاهرين بمنتهي الحزم .. الأوامر أبعاد المتظاهرين عن ميدان التحرير بأي طريقه .. أنصرف وتعامل (أصوات ضرب خرطوش وقنابل مسيلة للدموع تختلط بهتاف الشعب بينما شرار الطلقات تضيئ في الظلام كما يتصاعد الدخان ثم صمت تام)

(الإضاءة ترتفع تدريجياً كما لو أنها أشعة الشمس، تسقط علي وجه الضابط تزرغل عينيه بينما هو منبطح علي حافة المسرح كأنه علي سطح عماره ويظهر عليه التعب فهو في مكانه منذ أمس، موجهاً بندقيته القناصة في مواجهه الجمهور ويظهر أعلي البندقية منظار)

الضابط: الشمس ضاربة في عين الواحد لما أتعمي .. 72 ساعه من غير نوم وأخرتها باشا زي

انا ييات ع السطح .. 72 ساعه والواحد عينة مفجلة وصباعه ع الزناد ومش عارفين نضرب ولا مانضربش ده أنا باشا .. باشا ياولاد ال (صوت بييب) كل ده بسببكو يا أهل الصمت ؟ (يمسح وجهه بكفه ويتطلع للميدان) إيه ده ماسورة بن أدمين ضربت في المنطقة كل دول بيتحدونا إحنا .. عليا النعمة نكتة لما شوية عالم زي دي يعملوا فينا كده! ده أنتو بتشوفونا تتدارو .. ده إحنا أسيادكو يا ولاد (بييب) (صوت رنين المحمول نغمة راقصه ويرد باهتمام) ألوه .. صباح الفل يا باشا .. باشا أنا ع السطح من ليله أمبارح أنا فوق عمارة بتطل علي عيبنعم رياض .. شايف إيه أزاي ؟ باشا الميدان مليان بشر .. سعادتك الأعداد بتزيد .. أيوه فيها منظار بس ما أعرفش فصيلة أهاليهم إيه إذا كانوا عيال فيس ولا مسيحيين ولا مسلمين ولا أحزاب معارضة، مين باشا ؟ هما بتوع البرلمان كمان معاهم؟ البرلمان الثاني أنهو؟ البرلمان الشعبي الموازي؟ مش فاهم موازي أزاي يعني! هو البتاع ده ليه مقر هنا في وسط البلد ؟ مالوش ؟ طب وأنت شاغل نفسك بيه ليه ؟ طب

هما عاملينه ليه وإحنا أصلا عندنا برلمان.. باشا الكلام في السياسه بيعمل بيحموضه ..
 أيوه فهمت أنت تقصد أنهم مش معترفين بالبرلمان بتاعنا راحو عاملين واحد ليهم وسموه
 الموازي.. أه .. أيوه كأنهم بيقول لنا طظ في برلمانكو .. باشا.. الرئيس الأب قال خلوهم
 يتسلوا .. انا سمعتو في التلفزيون (ضاحكا) ماهو بيني وبينك إحنا السبب بردو ، الانتخابات
 اللي فاتت طفحت خره ، وريحتها قلبت الدنيا.. أنا بيتها لي الناس اللي في الميدان هاجين
 من الريحه .. جري إيه يا باشا هو انا بكلم حد غريب ما إحنا اللي طبخيناها.. أنا آسف
 معاليك، سلام (ينفث غاضبا) طب والنعمة العالم دي من أول الوزير لحد مدير الأمن
 شكلهم واخدين شومه علي دماغهم وعاملة لهم تربنه ؟ قعدو يفهمونا أنها شوية اعتصامات
 زي قبل كده وهاتلم قوام .. طب ده أنا كنت صدقت إننا سبقنا أمريكا في الإدارة .. CIA
 مين ياعم ؟ إحنا بتوع الإدارة الذكية والبطاقة الذكية والقرية الذكية وكلو تحت السيطرة ..
 والحكاية شكلها يفت وعناوين وعيشني في الوهم (ينظر في منظار البندقيه) يابن المجنونه !
 الواد بيتشعبط فوق تمثال عبنم رياض وبيريط في إيده علم مصر قال يعني حرر المنطقه
 يخرب بيتك ده الواد عبطاي أبن المكوجي! حتي أنت يامعفن عاملي ثورجي وبتاع .. ده
 أنت بتشوفني تحط وشك في الأرض ياواطي.. الله يرحم ابوك لما كان يقعدك ع المكوه
 الرجل ويزقك .. خلاص كبرت وعامل فيها جن! مسيرك تقع في إيدي وأحطك ع الشوايه
 (يدور بالبندقيه إلي مكان آخر) وإيه البشر اللي حوالين المتحف دول؟ قال يعني عاملين
 كردون وبيأمنو المتحف.. (ساخرا) باب المتحف في السقف ياشوية كاركات واللي عاوز
 يسلك حته بيسلكها من فوق! وإيه الأمور ده كمان الخلقة دي مش غريبه عليا.. الواد عامل
 فيها حامي الحما وبيأمن باب المتحف.. لاء كوماندوز ياعين أمك .. تعالي أشتغل مكاني
 أحسن .. يانهارك أزرق.. ده الواد سيد أبن عبده البقال؟ وحياه أمك لأشردك أنت وال
 (بيب) أبن المكوجي (يلتفت بالمنظار) حتي انتو يابتوع هشك بشك متجمعين حوالين
 جامع عمر كرم .. البت واقفه فوق السور وبتخطب ولا كانها سعد زغلول في زمانه.. بس
 موزة ولا بسه خفيف في عز البرد ، تكونوش فاكرين الحكاية فيلم وجايين تمثلوه علينا ؟ اللي
 في الميدان دول أتجننو ولا إيه ؟ ده إحنا أسياذكو ياولاد (بيب) فجأة كده تتجروا علينا؟
 ماشي سلميه وبعدين ؟ ماهو في الآخر بردو كل واحد ها يغور علي بيته .. وهانلمكم واحد

ورا الثاني ، ولا تكونو فاكرين هاتقولو سليمة وهاتاخدو اللي انتو عاوزينو! مافيش حاجة ببلاش ..كلو لازم يدفع وأنتو هاتدفعو التمن غالي قوي ولا تكونو فاكرين هاتقلبو علينا الترابيزة بكلمة سليمة بتاعتكو دي؟ (ينظر في المنظار في تحفز وضيق) الواد أبو فله مخططة ده مضايقني بشكل .. لافلي كوفيه علي خلقة وعمال يهتف والكل بيهتف وراه.. فاكِر نفسك زعيم ياروح أمك .. وإيه اليافطة اللي ماسكها في إيده دي (يقرأ علي مهل) الشعب يريد أسقاط النظام (يعتدل مفاجئاً) نظام إيه اللي يسقط يخرب بيتك؟ عاوزين تقلبوها فوضي؟ ده هي طلقه واحده في دماغك وأصفي لك كل الأفكار اللي فيها .. أنزل من علي كتفه (يقف صارخا في تحدي) أنزل ياد من علي كتف الحمار اللي شايلك ..انزل بقولك أنزل وأرمي الزيت اللي في إيدك ..أنا بحذر مرة واحده بس (ينبطح في غيظ ويصوب بندقيته ويضرب طلقه لها صوت مدوي ويترقب بينما الهتاف ينقطع للحظات وتتعالى ضحكاته في جنون) الطلقه قطمت الخشبة اللي عليها اليافطة نصين.. أستاذ ورئيس قسم (يضحك) الواد بيلف حوالين نفسه مش فاهم إيه اللي حصل .. بتبص فين يا أهبل؟ أنت لو قعدت ميت سنة مش هاتعرف الطلقة جت منين ..أنا طول عمري أدي أوامر ومافيش مخلوق يفتح بقه معايا بنص كلمة ..طول عمري بكلم الصمت.. صوتي انا بس اللي يتسمع .. طول الوقت ما بسعمش غير كلمة حاضر يا باشا.. وكلو وشه في الأرض فاهمين يا أهل الصمت ؟ أنتو مين يا ياولاد.. (صوت بيبب) أنا دفعت مقدم عشان أعيش زمني عاوزين بعد كده تسرقوه مني ! ده بعدكو

الضابط : أيوه يا بابا (ملتقنا في لهفه تاركا البندقية وجهاز اللاسلكي ويتجه لعمق المسرح كأنه في بيته مواجهها ووالده وامه) يا بابا الأيام الجاية بتاعتي.. هما عارفين كده ، أنا بردو فاهم العالم دي . دول .مايجوش ألا بالعين الحمرا ولازم يخافو مننا (ملتقنا لوالدته) يخافو علينا إيه بس يا حجه زينب ! أنا هايفيدني بإيه خوفهم علينا .. صدقيني دي أسمها مجاملات ونحنه .. أنا مابخرفش وهاقولها تاني بعلو صوتي انا مش عاوزهم يخافو علينا انا عاوزهم يخافو مننا.. هدي أنتي نفسك بس يا أمي وأعدلي الطرحه البيضاء الحلوه علي راسك وأسمعيني.. الدنيا كده .. أنتي أصلك مابتزليش الشارع إلا إذا كنتي راичه للدكتور..أيوه ماتعرفيش حاجه.. الناس كلها ماشية عاوزة تاكل بعض .. كلو عاوز يخزق عين كلو وكلو

عاوز يعدي الأول.. طب انا مستعد أراهن أن لو أي مخلوق منهم طال يبقي ريع باشا هيعمل قد اللي بعلموا عشر مرات .. ماهو اصل العملية ماشيه علي كده من أول فوق ، كلو بيلم وكلو بيلهط قبل الفته ماتخلص ، وماحدث فاضي يحاسب حد وماحدث يقدر يفتح بقه .. إحنا وبلا فخر عايشين في أكبر أوكازيون في تاريخ مصر .. واللي مظبط الليله أساتذة كبار في الاقتصاد ، أساتذة متخصصة في تفصيل القوانين ، عشان كل واحد ينجز اللي في دماغه من غير ماحد يقوله لاء ولا ليه .. واللي يعترض بيلبسوه الجلبيه البيضا وغالبا بشيل تهمة .. ومع الرأفه بيطلع عبيط ، يرضيكي أبناك يتقال عليه عبيط ؟ ده حتي في زمانا ده مافيش حد عبيط وعشان تبغو عارفين كلكو .. أنا مافيش قدامي غير سكة واحده أسمها السكة المفتوحة ومادام السكة مفتوحة يبقي لازم أعدي ، ومايسمعنيش ليه يا أمه .. حسن أخويا مابقاش صغير ده بقي في أولي جامعه ولازم يعرف الدنيا علي حقيقتها ولا أنتي عاجبك حبسته في أوضته ليل ونهار (يلتقت مفاجئا علي رنين جرس المحمول) الضابط : (ينبطح علي السطح ويتحدث) أيوه باشا .. ثانية واحده أتأكد .. فيه واحد علي إيده صليب .. وجنبه واحد شايل مصحف .. لاء مش بدقن قميص وبنطلون عادي .. بس فيه بدقن ، وشكلهم غريب ، والله ياباشا هما كتير وكلهم واحد صليب وجنبه واحد مصحف .. زحمه يا باشا مافيش مكان لرجل وفيه ستات بردو .. لاء مش كلو جلايب .. فيه موزز ومحجبات وعيال صغيره من كل الأعمار عندك من سنة وأنت طالع .. والله ياباشا فيه واحده ناحية عمر مكرم جاية علي كرسي عجل داخله ع الثمانين والواد السفرجي بتاعها بيزقها .. ماشي أنا ع السطح

الضابط : (ملتقنا عائدا للعمق ويجلس علي كلاسي ويبدو كمن يتحدث لأخيه) سيبك من الكمبيوتر اللي واكل دماغك ده يابو علي وخذ مني الخلاصة .. طبعا ياواد أنت أخويا ولازم أخاف عيك ، شوف يا بطل الناس 3 أنواع ناس تدفع وناس تاخذ وناس تسلك ومن كل المستويات من أول فوق لحد تحت وإحنا بقي من اللي دفعو .. عشان كده انا خدت وعد علي نفسي ان دي تكون آخر مرة ندفع (ملتقنا لوالده) فاكرا يا بابا السبعين ألف جنيه اللي رشيتهم علي النائب بتاع مجلس الشعب عشان يدخلني الشرطة ؟ .. انا جبت قراره .. النائب ده كل سنة ليه عشر تنفاز يدخلهم الشرطة .. آه حصه من مجلس الشعب .. كل التنظيم جاي من

مجلس الشعب وإيه رأيك أن السبعين ألف دول ورقه بوسطه ، طب ده ليه كمان 3 تنفاز يوظفهم في جمرک المطار وإثنين في الضرايب و10 تأشيرات حج .. كل ده ومعاہ إعدادية مضروبه.. بيتكلم حلو قوي وبيفك الخط بالعافيه .. بس شنطتة مليانه طلبات وكل طلب ليه تمن وزبون .. ده غير بقي العلاج المجاني وسفر فرنسا وأمريكا.. زي مابقولك كلو قانوني حتي مشاريب القهوة ما بيدفعهاش

الضابط : (ملتقتا لأمه) يامه بقولك قانوني تقولي حرام ؟ ده حقنا .. السبعين ألف اللي دفعناهم مش ممكن يروحو هدر وانا بعون الله هارجعهم بفوايدهم (ملتقتا لوالده) يا بابا ده أسمو إستثمار .. أنتو ليه بتدخلو الحلال والحرام في الموضوع ..أنت دفعت عشان تستثمر في أبنك.. كأنك حطيت ال70 ألف في البنك وبعد كام سنه بتاخدهم 250 ألف.. وزي ماخدوهم قانوني .. أنا هارجعهم لك قانوني وعليهم فايدة البنك

الضابط : (ملتقتا) سيادة النائب قالنا تجيبو الفلوس في شنطة سمسونايت..انا فاكرو اليوم ده، نزلت بعت عربيتك .. بعتها وإحنا في أشد الحاجة ليها هي اللي كانت شايلانا في مشوارينا وسفرنا (متأثرا) انا صعبان عليا اللي بيحصل (كأنه الأب) يابني أنا مسئول عن تحقيق أحلامك.. يوميا زي ما أكون خدت سكينه في قلبي.. ياخدهم ليه ولا هو حرام نحلم كنت شايفك بطرف عيني..عارف اللي جواك.. انت بردو عشري ومتعلق بعربيتك وجبتها بعد صبر وكفاح، كان حلم يبقي عندك عربيه ؟ ولما كان يحصل فيها أي حاجة تجري ع الميكانيكي تسهر جنبه لحد ما يظبطها وترجع مبسوط .. ولما تتأخرت كانت أمي تلومك (كأنه الأب) دي عشرة يا زينب.. العربية دي واحده من العيلة وزي ما بوديكي للدكتور هي كمان لازم نوديا للميكانيكي.. تضحك هي(كأنه الأم) هو انا زي العربية ياراجل (ملتقتا لأمه) ويوم مانزل ورجع من غيرها سمعتك (كأنه الأم) الله يخرب بيت العشرة وسنينها بتخلي الواحده تتعلق بحاجات فارغه.. يعني هي كانت بني أدمه (متأثرا) عنيني دمعت .. ماهو اصل الذكريات الحلوه غاليله ، بابا كمان الدمعه فرت من عنيه (كأنه الأب) الحاجة اللي بيخطفها الزمن من إيد الواحد ما بيرجعهاش ، (الأم) تهون بس أبني يدخل الكلية اللي نفسه فيها مقدرش أكسر بخاطره .. كانت ليله جنازة وأنا السبب .. كنتو فاكرين إني مش واخد بالي بس انا كنت عامل نفسي مش واخد بالي (هو نفسه) حطيت الأوراق

بتاعتي والفلوس في الشنطة وروحنا القهوة اللي بيقد فيها سيادة النائب
الضابط: (يتلثف مندهشا) معقول يا بابا هاندي الفلوس لسيادة النائب هنا في القهوة (ملتفتا كانه
النائب) أنا مش محتاج مكاتب أنا عايش بين الناس في الشوارع .. انا خدي مداس، إحنا
شغلطنا نخدم الناس .. أمال إيه .. أنا خدام ..الشنطة فيها أوراقك ؟

الضابط: فيها الورق والفلوس

الضابط: (محدثا والده متأثرا) خدهم من إيدك ورماهم للسواق اللي معاه..
الضابط: (كمن هو النائب) خد يابني الشنطة وأرميها في العربية وألزم عليها ورقه بأسم الباشا
الضابط: خلع قلبي وهو بياخذهم ، كان صعبان عليا ماما وانت وأخويا وأنا كمان صعبت عليا
نفسي .. كنا خايفين يرفض وهو زي الشيطان لمح في عيني إني زعلان
النائب : أنا مابخدهمش في جيبي .. دول بيتوزعو وحياتك .. معروف حصة كل واحد إنما أنا
حياالله بعملها لوجهه الله .. وبعدين أحمد ربنا أنك لحقت التسعيره القديمه .. وعموما لو
أنت متضايق شوف لك كلية ثانية .. روح أدخل حقوق .. ولا أقولك شوفو نائب غيري ..
هات الشنطة ياوله ..أنا عندي طابور مستتي إشارة من صباغي ، دي شرطة مش لعبه
أقعدو أشربو حاجة

الضابط : (ساخرا في مرارة ويلتفت لأخيه) حلم ! حلم مين يابو أحلام ؟ أنا لما كنت قدك كده
كنت فاهم زيك .. شوية أحلام ورديه علي شوية مجهود وإصرار وحبشهم بشوية تشجيع
علي شوية منافسه شريفه تدليك في الآخر تحقيق أحلام.. لكن في بلدنا الأحلام بيندفع
فيها فلوس، عشان تحلم لازم تدفع وممكن تستلف وتقبل الأهانه وتبوس الإدين والرجلين
لو لزم الأمر.. ولوعندك شوية طموح زياده تعمل حسابك إنك تتنازل عن شوية كرامه ..
ويا اما كده يا اما ماتحلمش ..وتخليك في حالك تاكل اللي يتحط لك وتشرب من مية
المجاري من سكات وتمنع الأحلام ..لأنك لو حلمت مش هاتلاقي قدامك غير سكتين ..
الأمراض النفسية ودي أخرتها مستشفى المجانين ، والثانية سكة اللي يروح مايرجعش..
مركب علي إيطاليا ، ويا أما توصل يا أما تلعب مع سمك القرش (ينهض علي صوت
جرس المحمول) راجع لك .. بس تعرف انا بحب أرغي معاك .. بحس إني علي طبيعتي
الضابط: (يتجه ناحية السطح وينبطح ماسكا البندقية) باشا هما كتير قوي تقدر تقول وانت مرتاح

أن أعداد المتظاهرين أكبر من تشكيلاتنا.. دول مش محوق فيهم خراطيم فيه ولا غاز وتقريبا الغاز بتاعنا مضروب صلاحية.. وشكلو بيلمهم وبيفرق التشكيلات بتاعتنا.. لا سعادتك ولا عسكري أمن مركزي ظاهر قدامي.. يعني هايكون فيه وأخبي عليك! وحياة غلاوتك ما شايف قدامي ولا فرد أمن مركزي.. ماهو يا أما حد من عندكو أداهم تعليمات يا أما خافو المتظاهرين يعتدو عليهم.. باشا أنا وفرقتي مطبقين خدمه 72 .. باشا أنت لو عاوز لبن العصفور أجيبهولك أحنا بعون الله نفوت في الحديد (صمت) وأشمعني الحديد ده بالذات يا باشا .. باشا الحديد ده كلو خوازيق (مفاجئا وغير مصدقا) أفندم؟ معاليك بتهزر ولا حاجه ؟ باشا ممكن تقولي السؤال تاني؟ أه.. كده معاليك بتتكلم بجد.. يعني انت عاوزني أعد اللي واقفين في الميدان! معاليك انا أعد النجوم اسهل..(بلهجه حاسمة) باشا إحنا في خدمة الوطن..شوف سعادتك انا دراس حساب مثلثات وبفهم في الطب.. خمس دقايق كتير وأقولك عددهم اللي تشوفه دقيقتين حلو .. أفضّل أقفل (يبصق علي التليفون في غضب) عليا النعمة اللي عملك مدير ظلمك.. وظلمك أنت ليه؟ ده ظلمنا إحنا.. ماهي الحكاية ماشية كده .. كل اللي مابيفهموش هما اللي فوق (يتطلع للميدان) أعد كل دول في دقيقتين ؟ ده طابور ذنب أسهل ! أبو مخ بياده بقوله مانمتش بقالي 72 ساعه ويقول عد اللي في الميدان أما حتة غبي ، نفسه يسمع الأجابة اللي علي مزاجه ووظ في أرض الواقع ! (ينظر للتليفون مفاجئا) ينهار احوس (يصطنت للتليفون كمن يتأكد ويهمس) ألوه !! باشا ! (مرتبكا ويبعده) يامه ! باشا أنا؟ أنت ؟ أنا شغال..لالا.. مش..انا ؟ مين اللي شتم وانا أطلع عين اللي خلفوه ؟ أنت سمعت حد بيشتم ؟ ده غالبا صوت خارجي من الميدان، عالم زباله لسانها طويل، أيوه بعد فيهم ، باشا أنت عاوز عددهم من وجه نظر مين بالضبط ؟ القناة الأولي ولا القناة الثانية ! ياه .. ياباشا مش تقول كده من بدري.. أنا قولت لمعاليك انا أصلا بتاع هندسة مثلثات (يعطي ظهره للميدان) شوف سعادتك ميدان التحرير يجي له بتاع 50 ألف متر مربع .. والمتر بالصلاة ع النبي ياخذ له 4 تتفار.. باشا أنا بكلمك ع الطبيعه وشايف بعيني .. زي مابقولك كل أربعة واقفين في متر ..أضرب بقي سعادتك 4 تتفار في خمسين ألف متر يبقي العدد يوم ما يضربة الدم 200 ألف نفر.. لاء سعادتك دي هندسة مثلثات مش طب ، يعني بالصلاة ع

النبي تجهزو لنا اللازم نرشفهم قوام وقوام ونروح ننام ونلم الدور ونرجع الأستقرار .. باشا إحنا لو أستئينا أكثر من كده الشعب هايركب (في ضيق) ليه كده يا باشا ؟ باشا أنا قصدي ..! سعادتك فهمتني ..! انا قصدي يركب الموجه .. اللي تشوفه معاليك نلغي كلمة يركب من القاموس ، باشا انا صباغي ع الزناد ومستتي الأوامر .. باشا أنا قناص وبصطاد الحمامه في الهوا من الوضع راكبا الموتوسكيل .. اللي تشوفه أحنا في خدمة الوطن في أي وضع الضابط: (يغلق تليفونه) نتأكد انه مققول (صائحا في غيظ) عليا النعمة الراجل ده عبيط وتبقي مصيبه لو اللي فوق كده كمان .. كلهم عاملين زي القط اللي في ديله ورقه وبيلف حوالين نفسه يا عالم خدو أي قرار وريحونا بقي .. أنا تعبنا ونفسي أرمي جتتي علي أي سرير وأغمض عيني ولو خمس دقائق

الضابط : (يترك مكانه عائدا للعمق ويلقي بنفسه علي السرير) أه .. عمري ماتعبت التعب ده في حياتي .. أنت لسه فاتح الكمبيوتر ؟ 72 ساعه واقف علي رجلي والمصيبه أن ماحدث عارف الموضوع هاخلص امتي وأزاي (في تعب شديد وهو ينظر للسقف ثم يضحك) أصلي أفكرت أغنيه قديمه .. يا أخي الناس بتوع زمان دول كانوا بيقولو كلام حلو بردو (يغني) خايف أقول اللي في قلبي ترعل وتعند ويايا .. آه .. وأنا قلبي شاييل بلاوي بس ماأقدرش أتكلم .. كأن علي قلبي جبل .. تعرف أنا ساعات بتكلم مع نفسي .. أصل السكوت بيخلق .. حتي مراتي ماقدرتش أقولها ماهو في الآخر بردو الواحد لازم يلاقي حد يسمعو غير نفسه .. مهم قوي تلاقي حد يسمعك عشان يزيج عنك .. أنا كنت فاهم لما أدخل الشرطة ها دافع عن المظلوم .. أصل أنا مابحبش الظلم ، بس بعد مادفعنا اللي ورانا واللي قدمنا عرفت أنني أكثر واحد مظلوم .. سيب الكمبيوتر وأسمعي .. أنا فعلا تعبنا ومحتاج انام .. بس حاسس إن الكلام هايريجني أكثر من النوم .. تصدق أنا أحيانا مابقاش فاهم نفسي وساعات مابعرفش انا مين .. خصوصا بعد كل عملية بنطلعها .. بس أوعي تجيب سيرة لمخلوق ، لا بابا ولا ماما وبالأكثر صحابك اللي ع الفيس بوك .. مش عشان أنا باشا لاء .. عشان اللي هاقوله لك خطر علي حياتي .. عارف إحنا لما بنطلع عمليات نظارد الأرهابين في سينا ولا الصعيد أوحتي أمبابه ولا والجماليه ولا أي حته ماكنتش بتعب كده أيوه أنا واحد من القناصة وكل الأسماء اللي بتقراها في الجرايد عن الضباط اللي قامو

بالعملية كلها أسماء وهميه.. بنطلع المأمورية في أي وقت علي حسب الهدف اللي رايعين نصطاده.. الفجر الضهر أي وقت.. عمليه محسوبه نصفي الأرهابين ويلمو منا السلاح ويرجعونا المعسكر في طيارة أو عربيه مصفحة نخلع الماسكات ونرمي هدومنا أيوه بنبقي لابسين ماسكات علي وشنا عشان ماحدش يعرف إحنا مين .. بعد كده ندخل ع الحمامات ناخذ دش ننزل طرطشة الدم من علي جسمنا .. أيوه في علميات بنقتحم فيها شقق وبيكون بيني وبين الهدف نص متر وهدومي بتغرق دم .. الثانية عندنا بتفرق ماهو أنا لو تأخرت نص ثانية هايفيني هو.. بعد العلمية لازم نبات في المعسكر ليله ولا ليلتين علي حسب حالة كل واحد .. يقعدونا مع أمام المسجد ولا دكتور نفساني نسمع الكلمتين الحلوين .. ولما أعصابنا تهدي يدونا 48 ساعه فسحة

الضابط : (ملتفتا لأمه كانها دخلت الحجرة وتقف بالباب) لا يا امي انا مش قتال قلته .. هو يعني كل اللي في الشرطة بيقتلو وبعدين ما أنتي عارفه إني بشتغل في المطار وساعات في السياحه ..أي باشا زي حالاتي لازم يكون معاه سلاح .. ده عهده مانقلقيش .. إنما أقتل صعب ؟ ده ماياخدش الروح ألا اللي خلقها ..أنا مش عزرائيل أنا باشا .. أدعي لي يا أمي .. وانتي من أهلو

الضابط: (يقترّب من أخيه) يا عم سيبك من الفيس بوك واسمع دي..(يرتدي ماسك ويتحرك ناحية البندقية) جت لنا أخباريه نطلع نصفي أرهابي في أسيوط .. اللي فتن عليه واحد منهم .. المحامي بتاعهم شخصيا ، أتخط لنا الخطة انا كنت قناصه علي سطح عماره بتطل علي موقف العربياتاللي هايركب منه الأرهابي (ينبطح ويوجه بندقيته ناحية الجمهور) وفيه قناصه ثاني أمين شرطة في الموقف لابس صعيدي.. المشكلة إن ماحدش فينا يعرف شكل الأرهابي اللي رايعين نصفيه .. أتفقنا مع الدليل بتاعنا أنه هايقرب منه ويحط إيده علي كتفه عملية ماتخدش غير ثواني ومافيش مجال للخطأ والموقف زحمه مليون عربيات وبشر .. الدليل قرب منه والأرهابي زي مايكون حس أنه أتغدر بيه ، كان لابس جلبيه زرقا لمحت تحت جلبيته رشاش آلي ، أتلّفت فجأة ناحيتي.. لمحني ع السطح.. عينه جت في عيني ، بص لطرف البندقية وقبل ما أضرب الرصاصه كان وقع ميت (يخلع الماسك) أنا متأكد ان مش انا اللي قتلته .. فجأة سقط جوه الجلابية .. مات من خوفه ، مات قبل

الطلقة ماتوصله إنما أنا ماقتلتوش.. روحه كانت خفيفه ماقتلتوش.. فاهمني.. فيه ناس كده روحها خفيفه إنما أنا مش قتال قتله مش قتال قتله.. (يتنفس بصعوبة ويهدأ) أنا هادي.. معلى أصلي أفكرت شكلو (هامسا) فيه ناس بقي العكس روحها متبته في جسمها.. فيه واحد أخذ سبع طلقات ، كل ماياخذ طلقة تلوحه لكن مايقعش ولا كأن فيه حاجه..كنت هاتجن يعني أيه أنت ضد الموت؟ بصراحة خفت منه.. أول مره كنت أخاف.. كان في إيده رشاش .. ماوقعش غير لما أخذ واحده بين عينيه.. بس ده كان يستحق.. بتاع كلو أرهاب ومخدرات وجماعات وسلاح .. باختصار كان راس أفعي ومالوش حل غير الموت..(يلتقط أنفاسه) قلق بردو الواحد يبقي طالع مأمورية وعارف أنه رايح يصفى له واحد ولا أثنين.. بس كل ده عشان نحمي البلد ولازم نكون متداريين ..مش لازم حد يعرفنا وإلا هانبقي صيد سهل للجماعات والأرهابيين ..فاهمني ؟ (يتمدد فوق السرير متنهذا) ياه أنا دلوقتي أستريح حاسس أن الجبل أنزاح من علي قلبي (ينهض علي جرس المحمول وينبطح علي السطح ويدقق النظر في المنظار) ، أيوه يا باشا ، ثانية واحده سعادتك.. أصل تقريبا فيه رضع كمان ، لا معاليك ، امه حطاه في عربية ببيها.. أيوه بأربع عجلات.. لونها كحلي ومرسوم عليها ورد ، باشا نونو بيرضع .. بقولك إيه يا باشا هو النونو ده يعتبر متظاهر بردو؟ أنا قصدي يعني قانوني ؟ يعني إحنا مثلا عندنا اللي ليه صوت لازم يكون معاه بطاقه إنتخابيه.. باشا أنا فاهم ان كلو أونطه .. أنا بس عاوز أفهم ده إيه نظامه .. نحسبه متظاهر ولا مانحسبوش؟ أنا شايفه عمال يوأو (يدقق النظر في المنظار) إيه الحلاوه دي يا باشا طب والنعمه كلامك مضبوط الواد عمال يوأو وبيرفض برجليه وإيديه كانه بيهتف زي أنت ما بتقول بالضبط .. ثانيه واحده وأنا أقولك (يدق النظر) وaaa..ووأو .. وaaa..وaaa.. شوفت ؟ يا نهار أزرق.. حتي الواد النونو بيقول نفس الكلام.. باشا دي باينه زي الشمس ماخذتش بالك أزاي ؟ الشعب يريد أسقاط النظام.. واضحه جدا حاضر بس ركز معايا ..وaaa.. وأو...وaaa..وaaa.. أهو أظن يعني واضحة جدا .. الشعب يريد أسقاط النظام.. ده ناقص يلحنها .. الواد ده متظاهر رسمي وأبن ستين (بيب) وبيحرض الناس.. يانهار أحوس ومنيل.. شوفت أمه ؟ .. يادي النيله .. أمه أشرت علم مصر صغنن كده وبترفف بيه قدامه والواد بطل هتاف ونازل ضحك (يتلفت مندهشا) باشا

أنت علي سطح قريب منا ولا حاجه ؟ أصل الواد النونو بيمد إيداه فعلا وعاوز يمسك العلم.. باشا أنت مكشوف عنك الحجاب أيوه بيضحك سعادتك.. علم مصر بيتلعب بيه في قلب الميدان .. باشا أنا مش مطمئن للعالم اللي شايلين علم مصر دول.. وخصوصا الواد النونو ده متظاهر وأبن ستين (بيب) أنا في إنتظار التعليمات سعادتك (يلفت إنتباهه صوت أغنية وطنية صادرة من الميدان من خلال مكبرات صوت ويأتيه ضعيفا ويتطلع في المنظار) برود العالم بتوع المظاهرات دي عاملين جو حلو (يقرأ) أرحل إيدي وجعنتي حلوه .. أرحل عاوز أحلق .. أرحل مراتي عاوزة تولد والواد مش عاوز يشوفك.. (يضحك) عفوا لقد نفذ رصيكم .. أرحل يا بارد.. أهو ده بقي اللي جاب م الآخر..

صوت: (صوت ياتي من إذاعة الميدان) والآن تستمعون إلي فقرة من الكذب الحصري الضابط : كذب حصري ؟ العالم دي بتتكلم بصراحة تفوق البجاحه .. بس الحقيقه بجاحتهم تعجب الباشا

الصوت: (هو صوت أحد المسؤولين) ميدان التحرير مش زي ما أنتو متخيلين.. ولا ملايين ولا بتاع دي كلها أشاعات .. وبعدين ماهي الطيارات صورت الميدان من كل ناحية والصور موجوده .. وكل الواقفين في الميدان صورناهم وعرفناهم وإحنا كمان عملنا دراسة علميه مستفيضه وقيسنا الميدان طلع مساحته 50 ألف متر مربع ، والمتر بياخد أربع تنفار أضرب 4 في 50 ألف يطلع كل اللي في الميدان 200 يوم مايضربه الدم ألف نفر (وجهه تعلوه الدهشة الشديده) قيسو الميدان وطلع 50 ألف متر ؟ الكلام ده بتاعي وأنا اللي قايسو بس كنت بهزر والنعمة

الصوت: ده غير بقي أن فيه عربيات ببيهاات وكراسي بعجل ودي بتاخذ مساحه .. أصلها محسوبة يعني م الآخر كل اللي جوه مايكملوش ميت ألفموضوع الملايين ده فيبييك الضابط: لاء بقي الدراسة دي انا كمان اللي عملها .. وده كده أسمو سرقه مجهود وتعجب .. ولا إحنا نتعجب وانتو تطلعو في الإذاعة وتبانو أنكم اللي بتفكرو

الصوت : وإحنا بنقول للمية ولا الشوية دول عيب كده .. كفايه بقي ويله أرجعو بيتوكو إحنا خلاص فهمنا.. روحو بالذوق عشان إحنا خايفين عليكم من الناس الوحشين يله يا حلوين وماتخلوش حد يلعب بدماغكو

الهتاف: الكذب حصري في الأعلام المصري

الضابط: أشرب بقي .. عشان تبقي تردد الكلام زي البغبغان.. (يعود ناحية السرير ضاحكا) تعرف يا حسن أنا ساعات أفكر نفسي بيا .. بقولها أنا بني آدم روح ودم ولحم وبحب .. بحب مراتي مش هي سابت البيت وخذت البنوته الصغيره وطلبت الطلاق بس بردو بحبها وهي كمان بتحبني وأنا بعذرها (متأثرا) البنوته الصغيره هي كل حاجة في حياتي .. بتجنن لما يعدي يوم ماشوفهاش .. أنا بردو مسئول عن تحقيق أحلامها (ساهما) ساعات يجي لي مأمورية علي غفلة في الفجر ولازم أنزل .. ببقى محتار أقولها إيه! مافيش هزار لازم أنزل .. البلد أمانه في رقبتنا تبقي حاسة إني في خطر ومش عاجبها شغلي بس انا بموت في شغلي هي بردو دلوعه وكلها رقه .. عارف لولا المظاهرات والقلابان اللي في ميدان التحرير كان زمني أنا وهي بنقضي شهر عسل جديد ، جبت لها خاتم ذهب ووعدتها نقضي إسبوع في شرم .. كنا متفقين أخذ أجازة يوم 25 يناير العيد بتاعنا .. قالت لي عشان يبقي صفحة جديدة في حياتنا وبردو يبقي يوم تاريخي بس للأسف الوزاره لغيت الأجازات كانوا عارفين من قبلها من قبل يوم 22 وهما عارفين أن فيه مظاهرات مراقبين العيال بتوع الفيس بوك، كلو متراقب ، محمول ونيت ، قالو لي صالح مراتك بعدين .. أصبر يومين ثلاثه لحد ما الاعتصامات تعدي .. بس الموضوع شكلو كبر والاعتصامات بقت مظاهرات مصر كلها كسرت حاجز الصمت (يلتقت بشكل مفاجئ) صورة مين دي اللي ع الكمبيوتر؟ يخرب عقلك أنت منهم ولا إيه ؟ مش الواد اللي اتقتل وعاوزين يلبسوه للشرطة ؟ الواد ده مجرم بتاع مخدرات والجروب ده متراقب أطلع منه فوراً .. هاعرفو أنك أخويا .. أنت مجنون ؟ هما اللي لازم يرجعو عن اللي في دماغهم ، إيه اللي خلاهم يخرجو من الصمت .. حاجز الصمت كان بالنسبة لي ضمان المستقبل ، كنت نايم ومطمئن أن بكره بتاعي .. الباشا اللي جوايا كان بيكبر كل يوم لدرجة إني كنت بتلخبط هو انا أسمى باشا ولا وظيفتي باشا .. وأستغرب قوي لو حد قال لي يا حضرة الضابط ، ضابط مين يا حمار .. أنا باشا .. مادام بتقول ضابط يبقي أنت أكيد ماجيتش مصر أنا باشا وبشتغل باشا وأسمى باشا طوب الأرض بيقولي يا باشا من أول ما أخرج من عتبه البيت ، البواب صباح الفل يا باشا، البقال صباح الرضا يا باشا، المكوجي صباح الجمال يا باشا وأنا مابردش لأن ده عادي، شغلانتي ع

الورق ضابط ودي مش مهم لكن قدام الناس باشا ، والكل عارف وما فيش مخلوق يعترض الكل يقول باشا .. زي زي موظفين الحكومه، مرصوصين ورا شباك حديد كأنهم في زنزانة ووراهم علي الأرفف ملفات الرخص ، وظيفتهم ع الورق موظفين ودي بردو مش مهم إنما وظيفتهم الحقيقيه موظفين عموم الرشوه ، كلمة السر عنيا ليك .. تضرب البريزة في الملف الورق يخلص.. ماضربتش يقولك الملف مفقود، لكن لو ليك باشا مسافة ماتشرب كوباية اللمون المشبره حاجتك تخلص .. كلنا متفقين علي كده من غير مانقول ، وكلنا عايشين في صمت.. واللي كسر حاجز الصمت لازم يدفع التمن.. أوعو تفتكرو أن الحكاية هاتعدي بالساهل.. مافيش أحلام بلوشي وما فيش حاجة اسمها سلمية ، ده قانون وماشي علي رقبه التخين وحتى لو أنتو عاوزينها سلمية إحنا هانسيبها بالساهل ..الحكاية هايبقي فيها دم ودم للركب .. وإحنا أول ناس إيديهم هاتتعاص بالدم ده ، عارف يعني إيه دم.. يعني جنازة في كل شارع .. يعني جثث فوق بعضها في كل مشرحه.. يعني حرقه قلب أم علي أبنها ، أنت ماتعرفش يعني إيه تقوت من جنب ودنك رصاصه ويتكتب لك عمر جديد.. اللي في دماغكو علي جثتنا أنه يحصل ده مستقبل بلد.. أحلام كبار البلد والأحلام دي أندفع فيها فلوس.. فلوس لا يمكن تيجي علي بالك.. فلوس أكبر من خيال أي حد.. ومش فلوس وبس دي كمان أتباع فيها كرامة عارف يعني إيه تبيع كرامة ؟ يعني أي حاجة مش مهم لا شعب ولا وطن

الضابط: (صائحا) غاز وأرض وتاريخ وأثار وإنسانيه وكل اللي يخطر علي بالك ، ويمكن كمان قبل مايخش الحمام يطلب الأذن منهم .. بقولك إيه الوطنية دي تسمعها في الأغاني ع القناه الأولي وماتوجعش دماغي .. والكمبيوتر ده تلغيه خالص من حياتك وخصوصا اليومين دول .. أنت هاتعمل فيها عفريت.. رموز البلد وطت عشان مشروع التوريث يمر (يلتفت في حده) هنا مين ؟ هنا آخر حاجة تفكر فيها .. هنا مش مهم إطلاقا.. هنا أهل الصمت .. المهم اللي برة ..أسرائيل !! برافو عليك ما أنت فاهم أهو.. البركة لازم تيجي من هناك واول ماتحل البركة الوريث يقعد ع الكرسي ويحط رجل علي رجل الضابط : (رنين المحمول) ألوه معاك ، باشا أنا ع السطح وصباغي ع الزناد (يلتفت) أسمع أنا ماعنديش وقت.. أنا خايف عليك.. العيال بتوع الفيس وكل اللي في ميدان التحرير

واسكندرية والسويس والمنصورة وبورسعيد كلهم أتصورو وكلهم هايتمو المستقبل للي معانا بس ، فيه ناس هاتختفي من الوجود فجأة ومش هاتلاقي سبب .. خليك عاقل.. ووعد مني.. أحقق لك كل أحلامك ، ومستعد أمضي لك علي كده ..أحلامك أوامر.. الرئيس الأبن جدع ، هو اللي جاي ، هو المستقبل وإن شاء الله هو ناوي يغرقنا .. ياعم يغرقنا عز وفلوس.. سيبك من الكاريزما.. هو يعني الرئيس الأب كان شكلو كاريزما، مشي حالك العملية بيزنس علي كبير ..بلاش ظلم ، قبل ماتتكلم حط نفسك مكانه والنعمة هاتلاقيه يصعب عليك .. قلبه بيرفرف هاي موت من القلق.. هو متربي في قلب المطبخ ونفسه يقعد ع الكرسي رسمي.. بقال كام سنة بيتدرب عليها ، ياد انت عبيط هو الوقت بقي عنده خبره كبيرة ولعلمك هو اللي ماسك البلد من سنين بس لسه مابقتش رسمي.. وبعدين ماهو بيقترب من الشباب .. عمرك شوفت رئيس بيقتد مع الشباب ؟ طب بلاش دي .. لو البقال اللي تحت بيتنا تعب فجأة هيعمل إيه ؟ يقفل ولا يروح يجيب الواد أبنه يوقفه في الدكان ويشيل أسمه والدكانه تفضل مفتوحه ؟ ولا أنتو عاوزين تقفلو الدكان وتخربوها.. ماشي يعني إيه..؟ بتاخذني علي قد عقلي ياد ؟ أنا بقولك أهو ، النهارده بالذات ماتخرجش دي أوامر (يستعطفه) عشان خاطري.. لوبتحب بابا وماما خليك جنبهم.. ياسيدي أبقى أنزل بعدين بس نفص النهارده.. أتقنا ؟ سلام (يلتفت مفاجئاً) أختار بين بكرة وأمبارح يعني إيه ؟ قصدك إيه ياواد أنت ؟ ماشي لما أرجع نبقي نقعد ونتكلم ونبقي نختار.. ده أنت رايق ع الآخر سلام أحسن أتأخرت

الوقت الآن ليل

الضابط: (الضابط يتجه للسطح يجهز بندقيته ويبدو كمن يفكر في قلق) أما الواد أخويا ده عليه كلام.. ساعات كلامه يتوهني وساعات أحس أنه أكبر من سنه (ضاحكا) مثلما يحدث في الأساطير الأغريقية البطل يعود إلي نهايته المحتومه ..(ضاحكا) جيل مغفرت الضابط: (رنين محمول ويرد) باشا ؟ معاك (مفاجئاً) الضرب في الدماغ والقلب ؟ باشا دي معاملة أرهاب مش متظاهرين ؟ أوامر عليا ؟ (في جدية وحسم) باشا إحنا في خدمه الوطن.. التعليمات الجاية كلها ع اللاسلكي ؟ أيوه معايا ومشحون وميه ميه .. مسقطين شبكة ؟ أيوه باشا نظريه الفار في المصيده .. ممكن سؤال بس قبل ماتقفل بالنسبه للضرب

يعني فيه حد معين ؟ يعني جلايب دقون أحزاب معينه ستات ؟ سعادتك كلو رافع علم مصر حتي الواد النونو؟ التعليمات نساوي ميدان التحرير بالأرض ! تمام (يوجه بندقيته للميدان ويضع عينه علي المنظار في إصرار بينما يخرج من البندقية شعاع ليزر ، بعد لحظات تسقط أشعة الليزر من كل إتجاه ، من أعلي ومن الأجناب علي رؤوس الجمهور بالصالة وكانهم تحت التهديد) دي هاتبقي مجزرة الليله .. مش كنتو روحتو بيتكو وسمعتو الكلام (يتنهد) إني أري رؤوسا قد إينعت (في دهشه) أهلا أنت جيت تاني يابو فنلة مخططة .. وكمان صلحت الخشبة وأشمعني المرة دي مش لافف الكوفيه علي وشك (مفاجئاً ويبعد بندقيته كمن لا يصدق) ياليله سوده ؟ ده الواد حسن أخويا (ينظر مرة أخرى) أزاي ماخدش بالي ؟ الفانلة دي أنا جبتهأ له في عيد ميلاده .. قالي زوقك حلويا باشا (يرتبك ويرفع المحمول ويطلب) الشبكة متنبيله .. العنيد قايله مايتحركش من البيت.. أعمل إيه ياربي أخويا الوحيد هايروح مني وأنا اللي كنت هاقتله ..القناصة جاهزين في كل مكان ، والله أعلم مين مدسوس بينهم ، الخونه في كل مكان ، والوطنين في كل مكان ، اللي خايف ع البلد واللي عاوز يهد البلد واقفين جنب بعض ، البلد بقت سداح مداح ، الضرب هايبقي عشوائي (صارخا في هيستريا) لاء ماخدش يضرب.. أخويا الوحيد مش أرهابي ولا خاين ، أخويا خايف ع البلد ومستقبله ، الخونه في أيديهم البنادق والظباط في أيدهم البنادق، (صارخا للميدان) أهرب يا حسن .. مستحيل هايسمعني .. مستحيل صوتي هايوصله، هو في زمن وأنا في زمن تاني.. انا طول عمري عايش في أمبارح وهو أتولد في بكره .. يارتنني فهمتك من أول لحظة .. ركبت دماغي ، لاء .. بس أنا قولت له لما أرجع هاختر بكره (يدور كالمجنون ويبكي) أجيبك أزاي يا خويا ؟ لو نزلت بالبدله هايكلوني.. الناس خلاص بقو يكرهو البشوات (يخلع البدله) مافيش غير أي أخرج من جلدي عشان ألحقه ..ألحق حسن .. ده أنت كبرت علي أيدي ياما لعبنا واتخاقتنا ومهما تزعل كنت ترجع تصالحني وتقولي ماتزعلش أنت أخويا الكبير ، كنت بفرح لما تقولي أخويا الكبير أنا عمري مازعلت منك يا حسن (الآن يقف بملابسه الداخلية) أنا هاقله .. هاقله أنا كمان هاختر بكره ..هاختر أحلم بحرية وما أدفعش تمن اللحم ، هاألم بكرامه.. هو نزل الميدان يدافع عن حلمة، يدافع عن بكره (يهبط بين المتفرجين) أنت فين يا حسن ؟

ماتزعلش مني، أنا كنت غرقان في أمبارح هما سرقو مني الحلم بتاعي ع القهوة .. خطفه
 مني سيادة النائب.. النائب مش نائب.. النائب حرامي.. والبرلمان مش برلمان.. البرلمان
 وكر الخيانة .. وأنا مش باشا أنا واحد من حراس الوكر.. والرئيس ريس ع الورق بس ..
 وبردو ليه وظيفه خفيه.. والوطن مش وطن ..الوطن شقة مفروشة وكلنا بنتقابل فيها
 نحشش .. هما علمونا نبقي زيهم ولا هايلبسونا تهمه.. علمونا نسرق الأحلام .. أمي مش
 هاتستحمل تشوف أبنا غرقان في دمه .. سامحيني يا أمه .. انا ضحية نظام غبي حقير
 أنا مش عارف أنا مين وليه ؟ (يدور حول الجمهور صائحا) يا حسن .. ماسمعتش كلامي
 ليه يا أخي ..(أصوات طلاقات رصاص) الرصاص طاير علي كف عزرائيل (طلقه
 مدويه بينما الضابط يلتفت صارخا) حسن

إظلام تدريجي

إضاءة المشهد تتغير ويضاء المسرح بينما نري الضابط يرتدي بدلته يبدو كمن يقف أسفل تمثال
 عبد المنعم رياض ويحمل تي شيرت حسن ويظهر عليه آثار دماء وثقوب ،
 الضابط : هنا في قلب الميدان.. تحت تمثال عبد المنعم رياض أخويا أنضرب طلقه.. أنا شوفتها
 نورت علي جبينه .. أتعلق في قاعدة التمثال.. ودمة سال علي الأسفلت ..هنا تحت
 التمثال .. أنا شيلته بين أيديا .. قولت له أنا معاك.. أنا أخترت بكرة .. سمعني
 وأبتسم .. أبتسم من غير مايلحق يبص لي ، كان علي وشه ابتسامه .. أجمل ابتسامه
 شوفتها في حياتي .. كان عارف أنه أنتصر واللي في إيده السلاح هو اللي انهزم .. بس
 مش انا اللي قتلته ، اللي قتله واحد مش مننا ، اللي قتلة خاين غريب عن ارضنا ، بس في
 الآخر بكرة كان لازم ينتصر علي امبارح .. ملعون أبو أمبارح اللي سرق مننا كل معني
 جميل ملعون أبو أمبارح اللي سرق مننا مستقبلنا .. ملعون ابو أمبارح

أظلام

تمت بحمد الله